



Image Courtesy : Ghazal Qadri

अर्यनिमालि
हुंघ
लोलु वऒन

★ ★ ★



Compiled : M.K.Raina

(१)

क्याह वनुयो मति

क्याह वनुयो मति क्याह वनुयो

यी गोम पानस तु ती वनुयो
लान्युन न्याय छुम ती वनुयो
क्याह वनुयो मति क्याह वनुयो

★

बागस म्यॉनिस बादाम फुलुया
आदनु रॉवुस तु ती वनुयो
क्याह वनुयो मति क्याह वनुयो

★

बागस म्यॉनिस चेरु फुलुया
वेरि चानि फोजमा तु ती वनुयो
क्याह वनुयो मति क्याह वनुयो

★

बागस म्यॉनिस गिलासु फुलुया
दिलासु द्युतुथाम तु ती वनुयो
क्याह वनुयो मति क्याह वनुयो

★

बागस म्यॉनिस टंगु फुलुया
लंजि लंजि फोजसा तु ती वनुयो
क्याह वनुयो मति क्याह वनुयो

★

बागस म्यॉनिस ऑल्युचि फुलुया
लोलुची करिथम तु ती वनुयो
क्याह वनुयो मति क्याह वनुयो

★ ★ ★ ★ ★

(२)

व्यदाख

अॅर्यनि रंग गोम श्रावन हिये

अॅर्यनि रंग गोम श्रावन हिये
कर यिये दरशुन दिये

शामु स्वंदुर्य पामन लॉजिस
आमतावव कोताह गॉजिस
नामु पैगाम तस कुस निये
कर यिये दरशुन दिये

कंदु नाबद आरुदमुतुय
फंदु वॅरिथ चोलुम कोतुय
खंदु वॅर्यनम लूकन थिये
कर यिये दरशुन दिये

मॅन्नरॉविथ न्यूनम कमि स्वने
बु ति पॉरस जुनील ख्वने
गोम त्रॉविथ रचन बिये
कर यिये दरशुन दिये

सुलि व्वथव संगरमालन
लालु छारोन कोहन तु बालन
छस बु गिरान तॅहिंजि जिये
कर यिये दरशुन दिये

बु छस प्रारान मंज पलहालन
लालु फेरान तुलु मुल्य नालन
पोशि डॉल्या तस कुन नये
कर यिये दरशुन दिये

★ ★ ★ ★ ★

(३)

दूर रूदुम अंदर वन तय

दूर रूदुम अंदर वन तय
वनतय वेसिये यियि ना सन
दूरि दोपुनम गछव वन तय
चूरि रूदुम मंज लासन
मूरि नार छुम कवु ललुवन तय
वनतय वेसिये यियि ना सन

(४)

क्या करु रूदुम सु वनुनुय फेरान

क्या करु रूदुम सु वनुनुय फेरान
सोरान छुम नो आदनुक स्नेह
कुकिला ऑसुस थरि ओल येरान
सोंतुचि वुजमलि गँडनम रेह
जुल्फुचि ग्रायि सुत्यु ग्यूर छुम गीरान
सोरान छुम नो आदनुक स्नेह

(५)

आदन बाजि म्यानि यारो वे

हा व्वलो म्वनि पॅल्य वंदयो पादन
आदन बाजि म्यानि यारो वे

आदनु ऑसुस रैज़ला नादन
यावुनस कदुर नो जॉनिय मे
दित्तुमो दरशुन छम चॉन्य लादन
आदन बाजि म्यानि यारो वे

कुकिलि पुर्य कवु त्रॉविथ क्वलुरादन
दुकलि व्वंदु म्योन गव
मे कलि चानि ब्रॉथ्य गॅयि मो नादन
आदन बाजि म्यानि यारो वे

चेनतो लेदुर्य पोश फोल्य क्वलुरादन
अज छुम आदन, वातुहम हय
दिहॅमय दरशोन सर वंदय पादन
आदन बाजि म्यानि यारो वे

★ ★ ★ ★ ★

(६)

आलव दीतोसे

मे शोकृ यारु सँदि बँरिमस प्यालु तु
आलव दीतोसे
तरवुनि मर्गय वसवुनि बालु तु
ऑही नीतोसे
क्याह करु नियिनम हरनुनि छालु तु
आलव दीतोसे
कंद तय नाबद बँर्यमस थालु तु
रंगु रंगु नीतोसे
जोद गव आशकन दोद क्यथु चालु तु
आलव दीतोसे
★ ★ ★ ★ ★

(७)

शेरि ह्यमयो व्वलो

कर लगन चॉन्क् कदम सानि आँगॉनी
शेरि ह्यमयो व्वलो
बु द्रायस देर्य चाने पर्दु चँटिथ
बेयि यितमो व्वलो
बु ? हीमाल ऑसुस बाल म्वच्रेयस
पोशि तुलो हो व्वलो

★ ★ ★ ★ ★

(८)

आशो वे

आशावंदन हुंदि आशो वे
गटि मंजु हावतम गाशो वे

लासन गोमो राशो वे
प्रारान छसयो आशो वे
म्यत्रन हुंदुय ब्योला वॅविजे
शॅथरन ति वॅर्य जि नु नाशो वे

★ ★ ★ ★ ★

(९)

शामु स्वंदरे मे कर पूरि

शामु स्वंदरे मे कर पूरि
रोजन दूरि, यियम ना

कॉव्य विहनम अॅर्यनिनि नहे
अज्ज यियि यार, बु नावसय
क्वंगु कोस्तूर बेयि अंबरु
सेंदि ज़लु तन नावसय

मॉर्य मँदिस त्रॅहनु रॅस्तिस
पॉर्य लगसय बु नावसय
सॉरी त्रॉविथ तस पतु लॅजिस
क्या करु वेस्य बनावसय

★ ★ ★ ★ ★

(१०)

वनतु वेस्य् कुक कस पच्चे

वनतु वेस्य् कुक कस पच्चे
कुस वुन्युब वॅरिथ गोम
हच्चि लोमुनम नैदरि मच्चे
मच्छि मच्छु बंद सॅनिथ गोम
स्व न्यूनम रच्चि रच्चे
कुस वुन्युब वॅरिथ गोम

(११)

हन हन छम लोलु चानि बॅरिथ

हन हन छम लोलु चानि बॅरिथ
ज्वलु छम नो स्वंदरे स्वंदरे
तीरि मिच्चगान दितिथम दॅरिथ
गॉम जिगरस पंजरय पंजरय
दॉद्य लद छस कोत ह्यकु लॉरिथ
ज्वलु छम नो स्वंदरे स्वंदरे

वॅछ वॉलिंज हावय मुच्चरॉविथ
वॅछ पन ज़न हरयो हरयो
मच्छि बंद ज़न गच्छय लॉरिथ
ज्वलु छम नो स्वंदरे स्वंदरे

गच्छि कुठिनय थावय वथरॉविथ
 लच्छि नाव्यो मंदोरे सानि बेह
 अच्छि दॉर ज़न रोज़य पॉरॉविथ
 ज्वलु छम नो स्वंदरे स्वंदरे

लालु गोमय बागु मंजु नीरिथ
 पोश लागस ग्वंदरे ग्वंदरे
 केह नु मंगुहस यियम ना फीरिथ
 ज्वलु छम नो स्वंदरे स्वंदरे

(१२)

चोलुमय यार वेसी

याम हूरि मे टूरि चंद्रुन मोलुमय
 ताम चोलुमय यार वेसी
 दप्योम आगस, बो रोशि ज़ागस
 लागस बो शेरि ही
 वंदुकिस बागस पोशाह फोलुमय
 तामथ चोलुमय यार वेसी

★ ★ ★ ★ ★

....
(१३)

वृजमलु ज़न द्राव

चमकान ओबरु तलु वृजमलु ज़न द्राव
आयि ग्रायि छायि गित्य करान ज़न आव

डोटु फोल किथु रूद नबु नार बरान
गगरायि करान ज़ोल ज़न वाव
नेह छटि अनिगटि मशनस शामन
मे बालि थोवुनम सुय आमताव

★ ★ ★ ★ ★

(१४)

यारु लोल हो आम चोनुय

कावु रंग कोरथम हावू दीदारो
यारो लोल हो आम चोनुय

छांडान लूसस गामु शहारो
डीठिम सॉरिय, च़ेय ह्यू नु कांह
तनि ट्वफ लॉयिथम गुलि बॉबूरो
यारो लोल हो आम चोनुय

★ ★ ★ ★ ★

(१५)

रातस ओसुम लवु ज़न लॉरिथ

रातस ओसुम लवु ज़न लॉरिथ
सुबहस विं क्यथु त्रॉविथ गोम
बबरि चमन अशि सगुनॉविथ
अशि मोत कवु पशिनाँविथ गोम
सवाल कॅर्यतोस ही गछु छॉविथ
सुबहस विं क्यथु त्रॉविथ गोम

★ ★ ★ ★ ★

(१६)

कँहंदि बो ज़ायस

वुछतु वेस्यु कँहंदि बु ज़ायस
 बागुनि आयस कँहदे ताम
 दूह अकि मॉल्यु माजि नगरु हरशायस
 शहरुच ऑसिथ वॉचुस गाम
 सति दोह्य फीरिथ मालिन्यव अन्यायस
 बागुनि आयस कँहदे ताम

दूह अकि श्रेहु सान माल्युन गँयायस
 उचकु बजि काकुनि दिचुनम पाम
 उचकु रुचु ज्यवुनुय कोनु म्वयायस
 बागुनि आहस कँहदे ताम

★ ★ ★ ★ ★

(१७)

अदु कर यियम तय

अदु कर यियम तय
 बरुसय मलुरुयव मलुरुयव मस
 चैयिना सन मस
 चविना ना सन मस

कमि स्वनि हॉवनस तन
 कॉल्यु गिलि हय वुहुवनम
 प्यठ संगरन

हलि छुस खंजर तय
तीर हय लॉयिनम
पोशि पंजरन
कॉल्य गिलि हय वुहुवनम
प्यठ संगरन
★ ★ ★ ★ ★

(१८)

पदमॉनी कर यियम

पदमानि कर यियम तय
वदुनस छुम नु छयन
ओश छस त्रावान चाले चाले
मशि कर छुम त्रॉहन
लशि नारु जॉजिनस, म्यूलुम ओश तु अन्न
★ ★ ★ ★ ★

(१९)

बालि राह क्या छुमय

ज़ार वनतस हा वेसी, बालि राह क्या छुमय

आरु रोस्त गॅछिथ रूदुम निशि परज़्यन
नार गौंडुनम यनु बूजुम निशि परज़न छुमय

तनु हय वेसी तमी दादि छुम नु पकान अन्न
मे छु तमा बालि तिहुंद, निशि यार गोछुमय

★ ★ ★ ★ ★

(२०)

वोद अमि कुकिले

वोद अमि कुकिले दिल म्योन दोदुय
हा वॅग्म्यू रिद्य बूज़ म्योन कू कू

लॉलि तु मजनून् नरदस गिंदुय
त्रोवुन शशपंज प्यव दुखाल
लॉलि हुंद हावस दावस लोगुय
वुछ तु वेस्यु यार म्योन त्रोलुय

यार दय स्यठाह म्वलुलुय छुम
रचाम नालु तु वुछनम होतुय

★ ★ ★ ★ ★

(२१)

छोलुम तु छोकुम

वनतु कवय दूरि रूदुम
यान्य् मे मोलूम दूरि चंद्रुन
दोब्बु वानु छोलुम तु छोकुम
कूठ प्योम यारु दोद
छलु-छोख नाहकय रॉविम

★ ★ ★ ★ ★

(२२)

म्योन ह्यू कस गव

अस मय वेसी म्योन ह्यू कस गव
यस गव मसवलि गंदुर हवॉय ?
रोबु खानु बिहिथुय दॅरीचस ठस गोम
जोनुम सुय मा आंगन च्नाव
यार नय ड्यूदुम वॉलिंजि च्नस गोम

★ ★ ★ ★ ★

(२३)

अँगुनु गगनु गगराय

अँगुनु गगनु गगराय
नबु नारु वुज्जमल द्राय
अनतन पी, अनतन पी
आंगन सानि छय फोजमुन्न ही
चँटिथ लागस शेरे
अनतन पी, अनतन पी

(२४)

वनु कस वेसिये स्वनु छम गेलन

वनु कस वेसिये स्वनु छम गेलन
यनु यौर्य त्रँवनम करुन्य कथ
शयि यार अँस्यतन तूश्यतन परज्जन
तोति छम व्वंदुसय सथ
छम मे लादन अकि लटि यियि ना
हटि कुय वंदुसय रथ
रावि आदन पादन प्यमुसय
लति कवु वँरनम लथ

(२५)

वेसिये पछ नय तँहघन कौलन

वेसिये पछ नय तँहघन कौलन
लोलन मुह तय फिर्यतोने
यथ बवसरुसुय
केह नय कोलन
याम फोल्थ थरि गुल, ताम बर गँय
स्वंदरु मा गलान, गंदर मा डोलन
लोलन मुह तय फिर्यतोने

(२६)

आयस बु नीरिथ शोक चाने

आयस बु नीरिथ शोक चाने
चौरिथ वुछमय बुमय
मे कौछुमय च्चे लोगुयो रुमु रेश्युन आय
दाय वॅम्प्य द्युतुनय छय नो फेरन माय

(२७)

गाह सपदान त्राम गाह सपदान ल्वय

गाह सपदान त्राम गाह सपदान ल्वय
 बे कौलन सुत्थ् थँविज़ि नु ख्वय
 पत्तु पत्तु कर्यामस, हत्तु हत्तु छोटुम म्वय
 हत्तु गोर यार म्योन कथ गुरु गवय
 शाम छुस जुल्फ तय सुब तसुंद र्वय
 बे कौलन सुत्थ् थँविज़ि नु ख्वय

संज़रछि मंज़ वति त्रॉविथ शामन
 खामन सुत्थ् नो थँविज़ि नु ख्वय
 बर बुक् आयस चाख दिमु जामन
 गलि अंदर मन, खोटुनम र्वय
 क्याह करु लॉजिनस लोलुचन पामन
 खामन सुत्थ् नो थँविज़ि नु ख्वय

(२८)

स्वनु ही फोजिखय वनन तु क्रीडु ज़ालन

स्वनु ही फोजिखय वनन तु क्रीडु ज़ालन
 पुश्य वॉजिखय पोशि मालन किन्न
 गुल गछन बरु तय क्रीडस मा ज़ालन
 पलहालन माल्युन म्योन

(२९)

पी यियि ना दर्शुन दियि ना

पी यियि ना दर्शुन दियि ना
अछ रछि मन्नि व्वंदु दोद बले
आदन पानु मे गोछ ज्जीवादान
आदरु हादरु तिहँजे कले

(३०)

क्रूठ छु मुह नार

क्रूठ छु मुह नार राह क्या छु परजन
दरु नतु करु क्याह लोन येलि छले
क्वञ्जि करि छ्वञ्जि छँड पनु दाव काँचाह
तवु निशि मॉर्यज्यम म्वञ्जि कर्तले

(३१)

मे करि तस किच्चु पोशन मालु तु

मे करि तस किच्चु पोशन मालु तु
छावि ना ही, छसय म्यॉनी द्रुय
हावसु बॅर्यमस मदुकी प्यालु तु
यियि ना ल्वलि मंज करुसय जाय
दर्शनु तिहँदे बाल सम्बालु तु
छावि ना ही, छसय म्यॉनी द्रुय

(३२)

दामन बोरुम अशि मति

दामन बोरुम अशि मति
कामनु गिरान दूह गोम
सामानु गँडिथ आयस
यूत क्याह लोगुय नशु मति
पामन लॉजिथस क्याह करु
कामनु प्रारान दूह गोम

(३३)

गुं गुं मो कर यँदरो

गुं गुं मो कर यँदरो
कनुर्न पँलिलय मलयो

रबि तलु कौर तुल सौँबुलो
यँबुरजल प्यालु ह्यथ गिरान छय
ही थँर छस तय दुबारु फवलुयो
गुं गुं मो कर यँदरो
कनुर्न पँलिलय मलयो

(३४)

स्वनु छम गेलान

स्वनु छम गेलान कुनि छुम नु मेलन
 परज़न सुत्पु छुम खेलानय
 अशकु दौद्य सूर कोर पर्वतु शिलन
 अशकु चूर फोर बलवीरनुय
 अशकु दोद हनि हनि तनि छुम तेलन
 परज़न सुत्पु छुम खेलानय

(३५)

म्यानि मदनो हियो हियो

म्यानि मदनो हियो हियो
 छम चॉन्पु लादन इयो इयो
 दर्शुन दियो दियो दियो
 आदनु त्रे सुत्पु कर्योम वादय
 वादु कवु डौलुहम पियो पियो
 छम चॉन्पु लादन इयो इयो
 दर्शुन दियो दियो दियो

(३६)

केंह वचन यिम हब्ब खोतून तु अर्यनिमालि द्वशुन्य सुत्य मनसूब करनु आमत्य छि। यिमन
छुनु हब्ब खोतूनि हुंद ल्यखुत दिथ।

(अ)

काँव्य विहनम अर्यनिनि लहनय
अज्ज यियि यार, बु नावसय
क्वंगु कोस्तूर बेयि अंबरय
सेँदि ज़लु तन बु नावसय
मौर्य मँदिस त्रँहनु रँस्तिस
पौर्य लगस बु नावसय
साँरी त्रॉविथ तस पतु लँजिस
क्या करु वेस्य बनावसय

(ब)

छलु दिल हय वँडिथ न्यूनम
नाद लायस फेरि नाय
बाल लूसस बाल छंडान
बालि दर्शुन दियि नाय
वेरि तँहंजे बाल द्रायस
नाद लायस फेरि नाय
पतु वेस्य तूर्य गछोस
मोत रटोन नाल हय
मालु नीनम नालु वँडिथ
नाद लायस फेरि नाय

(ज)

नेह गटि न्नोलुमय सेंदि वावु त्रॉविथ
ती कस निश ह्यकु बॉविथ बो
गरि बाल द्रायस सामानु पुरिथ
कामनि प्रारान लूसुम दूह
पामन लॉजिनस गोम तम्बुलॉविथ
ती कस निश ह्यकु बॉविथ बो
कमि स्वनि बॅर्यनस कन ब्रमुरॉविथ
लशि नारु ज़ॉजिनस ती बावु कस
पशि पशि थोवनम हॉविथ तु बॉविथ
ती कस निश ह्यकु बॉविथ बो

★ ★ ★ ★ ★